

## Khovar Story by Sherzad Ali Haidar

### بیمو لهازی

شیرزاد علی حیدر

ٺهیکدارانان بچین رحمت وا عوامو بچین تبايو خبر انگياک، پورو ٻٽے ہون اف دیکار اچی لوٺ ٺویو  
بورورو نیزاوا، زیر بلی میکی دی موجود اسیتائی۔ بسے چائنو نوغ گيرو چھوتی رانگی بوٺهان لوو  
دیتی ریتائے کہ ہمیت مه پوشيرو سخت ٺانگ اشناری۔ اوا اسکوٺو بودوکی رانگا چپڑیان سار  
اچی ہموش ٺانگ پونگی چاکیونو نو پوشی اسیتام۔ خائے گازو قاضی فروسکیو لوو نو ماناک۔ زیر  
بلی میکیو ہش ای وشکی غیرے الیکو ہش بیانو کورا ٺاریران۔ قاضیو بیہ شک دی ہوئے کہ  
زیربلی اسانیا وام گنیکو لالچا بوٺهان اشتیکھے حوالدارو ٺاوو خوشان کوریکو کھوشش کویان۔  
کوریکو کہ حوالدارو ٺاو بوغدو تروئے سالو اندرینی کومورانان میک اپو سامانان اوچے بوٺهان  
بیزی می زبردست کمائی کوری اسور۔ مگم زیربلی میکی دی مضبوط دلیلار غیر کیہ لو نو دوئے۔  
بیغار پروشی کہ قاضی بوٺهان ٺانگیو بارا کیہ متنازعہ سوال کوئے، بتوغو اپاک شوپیکو موٺی تان  
زیربلی میکی تان دلانلان شروع اریر۔ بسے ریتائے کہ " اے برارگینیان، ہمی بوٺهان ٺانگیو  
ہموغار لوٺ ثبوت کیاغ بوئے کہ اسپہ نوغ وردی بیرو انشورنس کمپنیو ایجنٹ برارگینیانے  
ہمیت کریٹ ای مس کوروم دونیان۔" تان دلیلو سورا انجاس درے زیربلی ریتائے کہ " ہمی  
برارگینی اسکوٺو نوغ پنشنیران اوچے نوغ پی ٺی سی پوسٹ گانیران اچہ ہرونی دینیان کہ شندورو  
فائیل غاٺو اویلو ہافہ دی استور ہرونی نو دینیان۔"

گازو قاضی وا خور کھوٺی ہوستو سوم تعلق لاکھاک روئے زیربلی میکیو ہمی دلیلان کیہ بو نو  
خوشیتائی۔ مگم بیت دی کافی وختار ایری بیمہ ایجنٹان ہوست پرویلی اچتو چوکیکو پوشی  
اسیتائی۔ لہذا میکیو لوان نو خوشیئکو سوم جستہ بوٺهان بارا کیہ منفی تبصرہ نو ارینی۔  
ٺیکچھیو ایجنٹانان بارا صرف ہمونی شکایت اوشوئے کہ بیت چھوچھی بو ٺوت خامینیان، وا  
انشورنسو کھول نو باک فائدان اشمارو سوم جستہ ناشتو دی جاری ساتینیان۔ بیت ناشتو صرف  
چھوچھیو ہاسی نو جاشونیان بلکہ انوسو شاپیکوچے نماز دیگر وچاوتے غوش بوئے نو بوئے رے،  
ویزینہ پت گزارا بیکو ہش ناشتہ کونیان۔ مگم دیہو کیہ دی بیري نیسیرو بندہ (بیری نیسیرار  
مراد صرف دیہار بیري نیسیرو) بیمو کیہ دی پیکيجار متاثر نو بیٹی اسونی۔ مگم ہورو مطلب بیہ

دی نو کہ بیمو نوغ ایجنٹان وا پرائو افسران رویانته بیمو فائدان بارا معلومات تارینکو نو بیتی اسونی۔ بلکہ خیق نائب صوبیدار ریران کہ ہمیتان زبانہ برونی تاثیر شیر کہ بیت کہ تان ہے تقریران گنی لوکل کونسلیوٹے روپھیتانی، ضرور جیت بونی۔ جیت کہ نو بونی دی زارو ممبرو سار خامخاہ زیاد ووٹ گینی۔ موژغیشٹی ماشیر دی ہے بارا تان روایتی نوخوشینکو پھارو لکھی ران کہ ہے برارگینیان ای ای لو نیویشی گنیکو بش۔ مثالو طورا دوش تان گولوغو ٹیکھیچیو خورو شرانہ بوپتو ٹیکہ نیشی، اسپہ نست مسی وردی بیرو ایجنٹ، براموشو نویسوٹے بیمو فائدان لوو دیتی ریتائے کہ "وانگاہ کہ تہ ای چموٹ اوچھیتائے تھے ہش جوٹے کہ تو حوالدارو ژاوو دوکانو بہکی دوکان دیکو بوس۔ تہ ڈیک نو بیتی کہ اوچھیتائے، تھے فائدو تان لورے وا۔ بریکو بارا لو نو دوسی۔ بریک بر انسانو سورا فرض۔ البتہ بریکار اچی کیہ مالی فائدہ کہ اسپہ کمپنی دویمان، بتوغو لوو تے دیکو سار کایوچے تہ اژیلیانته دیک مناسب بوئے۔ کوریکو کہ تہ سار زیاد بیت ہے فایدو ہوش کونی۔"

زیربلی میکی بیمو فائدان سار زیاد ایجنٹانان نقصاناتان بارا معلومات لکھویان۔ میکی تن پراشو کوژان چھومیکوچے میہو زی چھونجیرو غون بیکو دی ای حد پت بیمو لہازی جشوران۔ میکی ریران کہ پھک پنشینو زیاد حصہ پونسنانو گولے گانیکہ خرچ بویمان۔ میکی تن لوو مزید وضاحت کوری ریران کہ ہے نوغ جوانان بیمہ کمپنیا بیکار پروشٹی اسپہ تے شرنگ شرانگ سلام دی نو کوراوتانی۔ ہنیسے کما دفعہ کہ روٹو دونیان، بر دفعہ ترانگے چانگ بویمان۔ وا بر چانگ بیکا کھوڑیو ہوستو موشی کوری میہی انگیتی تن وسعو مطابقہ خلوصو سورا تریڈینیان۔ کلہ پت کہ بیتانته یقین نو بویمان کہ مہ بیہ خلوصو نتیجا چانگ باکو ای پراش ہواز اریر، ہوستو نو لا کویمان۔ البتہ گزینوزاق صوبہ دار سلام کوری دینڈیری بیکو وا ہوستو موشی کوری چانگ بیکو، عمومی مسائلان موژی اشمار کویمان وا زیربلی میکیو پراشان بار بار تریز بیکو ڈانگ چانگ بیکو سار زیاد خوراکو کمیو نتیجا قرار دویمان۔ صوبیدارو خیالہ دنیا مالیاتی بحرانار اچی میکیو دورو اقتصادی صورت حال دی پھوو ٹیکہ شیاکو غون بیتی شیر۔ صوبیدار ریران کہ میکی تان غذائی ضرورتن پورہ کوریکو بچین بو دودیریو رشتہ دارانانته مینو بیکو، وا شوئیو تابہ اسیرو گرامبیشانان چایوچے شاپیکو پوشیکو عادت ساوزئے اسور۔ ہموش بحرائی صورت حالہ دیہو رویان نوغ بیمہ کوراک جوانانان سوم بیمہ کوریکو سلسلا تعاون کوریک دی کیہ بردیوٹے پون نو دویمان۔ مگم بیمہ کوراک دی تان نوکریو سلسلو برقرار بہچینکو بچین بر روٹو دیرووٹے بیہ لوو دیک فرض جشونیان کہ انسانو کیہ دی ٹیمہ بریلیک۔ وا خاص کوری صوبہ پختونخواہو پسماندہ علاقین ساوز باک ڈالڈا دون بیہ لوو یقینی ساوزے شیر کہ روے جو بشیر سالار پروشٹی پروشٹی جو دفعہ بارٹ اٹیکو خالو ژناک بانی۔ لہذا خیشیقان روشت مستقبلو بچین نیمہ کوریک انتہای ضروری، ہمی تمام دلائل تان ژاغا صحیح، مگم زیربلی میکی ریران کہ ہمی ایجنٹان لوو قبرا

چوکی شروع کونیاں۔ وا کیه وت کی بیه بارا سورا نیزی لو نو دونیان که انسان زنده بال بیتی دی بیمه پالیسیار کیه فایده گانیر۔ بیتان خور نقصاناتان لوو دیتی میکی ران که کیه دورا که کھوشون نیسیران، پرانو ایجنٹان وے سائلنسیرو موٹرسائیکلان سورا وا نوغ وردی بیرو پوی تان ژان ماری ہیرا تارونیاں۔ خیر مفت شاپیکو اوچے چائیو ژاغا وختی توریک ہر سرکاری اوچے نیم سرکاری ملازمو بنیادی حق، مگم شاپیکو ٹیمہ سیاسی لووان سوری پوری بحث کوریک البتہ رویان ہضم نو بویان۔ خوشانیوچے خفگیو ژاغا لوو غیردئے بیما تارئیکار پروشی تان وسعو مطابقہ اقوام متحدو عراق پالیسیار گنی زارو حوالدار میجرو تحریک انصافہ بیکا پت ہر موضوعو سورا غیچھان نیشئیے تبصرہ کونیاں۔ خاص کوری خوشانیو موقعا بت ایغو بوکھوتے خشاپ کوریکو بش تبصرو ہرونیہ پت جاری بہچینیاں، کلہ پت کہ آخری مبارکیوتے گیرو مینوان سوم جوستہ اوچ چائیو دی پینیاں۔ موژ غیشئی ماشئیر تان تعلیمو پروشہ لکھی بیه لوو دویان کہ بیمہ کوریک ای جام وا فایده مند کوروم۔ بیس ثبوتو بچین بیمو تان پرانو رسیدو بار بار نیزی پاشیئران۔ میکی رسیدو سار دی کیه خاص متاثر نو بویان۔ بیس بیه لوو سورہ یقین لکھویان کہ خدائے مو کورار، کیشو ریشوو بیزیمی بیمہ کوریکار اچی موشو ڈیک کہ اوچھیتائے رسیدو گنی کورہ بی، وا کیچیہ بیتی بیمو دفتر مشکی کسیر۔